


LECTIO DIVINA – LEPROZU NA'IN SANULU NO SAMARITANU NE'EBÉ HATENE AGRADESE

Karakterístika ida Jezús nia eskolante nian: gratidaun (Lucas 17,11-19)



“Bainhira ita hatudu agradesimentu ba buat hotu ita simu,
ita haluan liután ita-nia espasu
atu simu don ida boot liután”
(Saun Bernardo de Claraval)



«Hamriik, la'o bá! Ó nia fiar mak soi tiha ó!»

Introdusaun

Iha kapítulu 10 nia laran ne'ebé evangelista Lucas dedika ba dalan dixipuladu komunidadade Jezús nian, ho Mestre ihaulun, no ho finalidade Jeruzalém, ita hetan de'it: (1) feto kotuk kleuk (13,10-

17), (2) ema liman bubu (14,1-6) no (3) leprozu 10 (17,11-19). Ohin ita lee mak ida ikus ne'e.

Testu nia énfaze la'ós atu hatudu Jezús nia kbiit milagre nian, maibé hanorin maka'as ida kona-ba gratidaun. Ko'alia kona-ba Jezús ne'ebé kura ema-lepra sira-ne'e evanjellu haktuir iha kedas nia inísiu (ver 5,12-14), no defaktu, narrasaun inísiu nian ne'e maka apresentasaun ida nu'udar sinál evidente kona-ba realizasaun Jezús nia programa mesiániku: "Imi bá fali hodi hateten ba João buat ne'ebé imi haree no rona: "ema matan delek sira haree, ema ain aat sira la'o, ema moras lepra sira hetan isin moos..." (7,22).

Entaun tema dominante ohin nian maka gratidaun: iha testu haktuir katak hetan tiha isin-di'ak samaritanu ida, nia mesak – ne'ebé ema judeu sira konsidera malae no ereje - maka sente nesesidade atu filafali no tuku tuur iha Jezús nia ain atu agrade-se Nia. Kuriozu tebes atu haree katak metade husi relatu milagre nian dedika atu haktuir oinsá fó agrade-se no sá mak agradesimentu ne'e implika.

Iha finál istória nian, Jezús iha qualidade Mestre nian, halo pergunta tolu atu ita lee-na'in sira foti ita-nia konkluzau sira. Nune'e ita iha relatu ida ne'ebé pretende atu ita halo reflesaun séria.

Ita ba lee ho atensaun testu ne'e:

«Jezús liu husi Galileia no Samaria atu bá Jerusalém. Wainhira nia tama dau-daun ba knua ida, ema moras lepra na'in sanulu mai hasoru Nia. Husi dook sira hasa'e lia, dehan: "Jezús, mestre, sadia atan ami!" Haree tiha sira, Nia dehan ba sira: "Imi ba, hatudu imi an ba am'lulik sira." La'o tuir dalan, sira hetan isin di'ak. Sira ida, haree katak nia isin di'ak fali ona, fila fali hodi hahi'i Maromak ho lia maka'as; nia monu ba Jezús nia ain, hakru'uk to'o rai, hodi agrade-se. Ema ne'e Samaritanu ida. Jezús dehan ba nia: "La'os ema na'in sanulu mak hetan isin di'ak? Sira na'in sia iha ne'ebé? Ema ida la fila atu hahi'i Maromak, mak ema malae ne'e de'it?" Hafoin Nia dehan ba ema ne'e: "Hamriik, la'o bá! Ó nia fiar mak soi tiha ó!"»

Hanorin foun ida-ne'e inklui iha série katekeze tolu kona-ba orasaun no ida-ne'e mak ida dahuluk:

- (1) Orasaun agradesimentu no hahi'i'in nian: iha istória ema-lepra na'in sanulu nian (17,11-19).
- (2) Orasaun hahusuk nian/súprika nian: iha ai-knanoik juís aat no feto-faluk ne'ebé fó ulun moras (18,1-8).
- (3) Orasaun penitensiál: ai-knanoik kona-ba farizeu no publikanu (18,9-14).

Ita ba haree etapa sira katekeze dahuluk ne'e hodi deskobre itineráriu testu nian ne'ebé de-zenvolve liuhusi enkontru ho Jezús hodi tuir dinámika "husu" no "agrade-se":

- (1) Ema-lepra na'in sanulu ninia petisaun ba Jezús no sira-nia isin-di'ak (17,11-14)
- (2) Agradesimentu samaritanu nian no Jezús nia interpelasaun (17,15-19)

1. Enkontru dahuluk ho Jezús: ema-lepra na'in sanulu nia petisaun ba Jezús no sira-nia isin-di'ak (17,11-14)

Jezús liu husi Galileia no Samaria atu bá Jerusalem. Wainhira nia tama dau-daun ba knua ida, ema moras lepra na'in sanulu mai hasoru Nia. Husi dook sira hasa'e lia, dehan: "Jezús, mestre, sadia atan ami!" Haree tiha sira, Nia dehan ba sira: "Imi bá, hatudu imi an ba amlulik sira." La'o tuir dalan, sira hetan isin di'ak.

Parte dahuluk relatu nian informa mai ita kona-ba enkontru ida ho Jezús: oinsá grupu ida ema moras lepra na'in sanulu sai ba hasoru jezús atu husu nia kura sira. Jezús envezde kura sira, haruka de'it sira atu hatudu sira-nia an ba amlulik sira. Bainhira sira iha obediénsia ba Ninia liafuan bá, sira nota

katak sira sai isin-di'ak fali (tanba kbiit interna obediénsia nian ba Liafuan).

1.1. *Introdusaun: enkontru ho ema moras-lepra sira (17,11-12)*

Relatu komesa hodi deskreve (1) sirkunstánsia Jezús horik bá (“*atu bá Jerusalem*”), (2) fatin (“*entre Samaria no Galileia... knua ida*”) no (3) personajen sira (“*ema moras lepra na'in sanulu*”).

Ita hahú husi lokalizasaun. Referénsia ba Jezús nia viajen ba Jerusalém maka xave importante ida. Ita tenke haree Jezús nia hahalok no resposta fiar no gratidaun husi parte samaritanu nian husi pontudevista mistériu paskál nian.

Ita la koñese knua ne'ebé Jezús tama bá. Buat ne'ebé akontese maka Jezús halo parada ida iha viajen klaran. Iha ne'ebá mak ema moras lepra na'in sanulu, ho inisiativa rasik para “*husi dook*”. Indikasaun ne'e halo ita komprende katak sira iha la tama iha uma ne'ebé Jezús hela bá, maibé iha li'ur, provavel liu sira li'ur husi knua. Ida-ne'e hatudu desgrasa maruak: moras fíziku no marjinalizasaun sosiál no relijioza. Evanjellu ko'alia kona-ba “lepra” maski ohin ema hanoin katak moras ne'e la koinside ho moras husi “basilu Hansen nian”, basá iha tempu bíbliku ema hanaran ho forma jenérika moras hotu kulit nian ne'ebé daet maka'as, balun bele kura balun lae nu'udar lepra.

Iha kultura bíblika, se ema ida suspeitu moras ne'e nia situasaun sériu liu, no nia tenke hadook an husi vida sosiál no bainhira kura ona mak bele reintegra an fali, depoizde “ezame médiku” rigoroza no rituál sakrifísiu nian ida iha templu husi amlulik nia parte (kf Lev 13-14). Buat sira-ne'e hotu implika lakon tempu barak no gastu maka'as seluk.

Maibé, ¿oinsá frekuénsia xanse/oportunidade kura nian? Ezemplu ida: tuir mentalidade rabínika kura ema moras lepra ida difisil liu hanesan halo ema ida moris hi'as husi mate.

Tanba possibilidade rekuperasaun mínima liu, ita la hakfodak atu haree ema ida sai husi ninia izolamentu ho dezesperu bainhira ema ruma liu besik sira-nia abrigu li'ur husi sidade, liuliu bainhira rona katak ema ida-ne'e kura moras. Nune'e maka evanjellu haktuir katak leprozu sira-ne'e foti inisiativa.

Bainhira dehan katak sira hamriik “*husi dook*”, ne'e katak sira halo tuir Lei ne'ebé bandu kontaktu ho ema. Norma Lv 13,46 dehan katak ema leprozu: “*moris mesak: dook husi akampamentu nia sei halo nia horik-fatin*” (kf mós Nm 5,2). Maski nune'e, ema sira moras lepra ne'ebé hetan desgrasa ne'e no familia duni sira, forma grupu ki'ik solidariedade nian hanesan kazu ida-ne'e hatudu.

“*Distánsia*” ne'e natón atu bele halo diálogu ida, simu esmola, ai-moruk, no liuliu iha kazu ida-ne'e, atu ida-ne'ebé sira hein bele kura sira, bele haree sira. To'o iha ne'e buat hotu la'o tuir lisan tempu bíbliku. Buat ne'ebé la normál maka malisan lepra nian ne'e lori atu judeu na'in sia moris ho samaritanu ida, buat ruma ne'ebé la akontese se karik sira isin-dia'k.

1.2. *Ema moras lepra sira nia petisaun (17,13): “Jezús, mestre, sadia atan ami!”*

Ema-lepra sira ne'e diriye ba Jezús hodi hakilar. Sira bolu nia “*Mestre*”, (gregu= epistatēs) título ida ne'ebé rona de'it husi eskolante sira-niaibun no la'ós ema seluk: ida-ne'e maka pekuliaridade ida Lucas nian (kf 5,5; 8,24.45; 9,33.49). Moras lepra sira-ne'e tau sira-nia an iha fila eskolante sira nian, katak iha Jezús Mestre nia autoridade nia okos.

Hahú husi atitude submisaun nian ba Jezús nia autoridade maka moras lepra sira-ne'e husu Ninia laran-sadia. "**Sadia atan ami**", "miserere" komunitáriu ida-ne'e (kf Salmo 51,3), hanesan "miserere" tolu seluk ne'ebé ita rona ho modu individuál besik iha pasajen ida-ne'e: riku kanteen ba Abraun (16,24), publikanu ne'ebé arrepende (18,13) no ema matan-delek Jericó nian (18,38-39). Nune'e maka Lucas hatudu ema sira-nia hakilar husu tulun.

Nune'e, ita haree uluknanai apelu ba Jezús nia fuan nakonu ho laran-sadia. "Laran-sadia" dala ida tan sai Jezús nia estilu no konteúdu misaun nian, iha evanjellu ida-ne'e. Husu laran-sadia indika katak iha situasaun dezesperu nian, ema admite ninia nesesidade ba tatulun ema seluk nian no depende ba ema seluk nia laran-di'ak, buat hotu depende ba ninia gratuidade.

1.3. **Jezús nia resposta (17,14): "Imi bá, hatudu imi an ba amlulik sira."**

Jezús nia mandatu ida-ne'e ba leprozu sira tempu hanesan maka (1) finál normál ba kura leprozu ida nian tuir norma Testamentu Tuan nian: rituál ida purifikasaun relijioza nian; no (2) prova ida ba sira nia fiar.

(1) Mandatu atu bá hasoru amlulik sira ba purifikasaun: Ideia maka bainhira ema ida kura ona nia bele tama ho modu ofisiál iha sosiedade. Tan ne'e tenke tuir ritu iha Levítico 14,2-8. Nia haruka ba "**amlulik sira**" (iha plural). Karik tanba sira grupu mistu ida: judeu no samaritanu; nune'e ida-idak ba ninia fatin. Nia la haruka atu ba Templu, maibé bá hasotu amlulik iha fatin ne'ebé de'it nia hela bá, maibé, se tenke halo sakrifísiu balada nian, ita supoin katak sei ba Templu.

(2) Prova ida ba sira-nia fiar iha Mestre: Jezús haruka sira molok kura. Buat ne'ebé Jezús halo la normál, basá ema moras ba hasoru amlulik de'it bainhira kura ona. Nune'e ida-n'e iha valór prova nian ba fiar ne'ebé leprozu sira iha ba Jezús nia Liafuan.

Ba leprozu sira ne'ebé bolu Jezús "**Mestre**", sira hetan pedidu atu submete ba nia Liafuan nia kbiit; hanesan Simão Pedro bainhira iha nia loron vokasaun nian, iha tasi, dehan ba Jezús "**iha ita-nia Liafuan ha'u soe dai sira**" (5,5).

1.4. **Verifikasaun kura nian (17,14b): La'o tuir dalan, sira hetan isin di'ak.**

La dehan katak Jezús fó orden ida – husi dook – ba moras atu lakon. Kura ne'e realiza tanba fiar leprozu sira nian iha Jezús nia liafuan, ne'ebé la husu buat ida selae buat ne'ebé normalmente ema leprozu ida ne'ebé di'ak ona tenke halo. No iha momentu ne'ebé sira kumpre orden ne'e – liutiha enkontru ho Jezús no dook husi Nia – milagre ne'ebé sira husu akontese duni: "**hetan isin di'ak**". Nune'e, milagre akontese iha jestu obediénsia nia laran.

2. **Enkontru daruak ho Jezús: samaritanu nia agradesimentu no Jezús nia interpelasaun (17,15-19)**

Sira ida, haree katak nia isin di'ak fali ona, fila fali hodi hahi'i Maromak ho lia maka'as; nia monu ba Jezús nia ain, hakru'uk to'o rai, hodi agradesese. Ema ne'e Samaritanu ida. Jezús dehan ba nia: "La'os ema na'in sanulu mak hetan isin di'ak? Sira na'in sia iha ne'ebé? Ema ida la fila atu hahi'i Maromak, mak ema malae ne'e de'it?" Hafa'in Nia dehan ba ema ne'e: "Hamriik, la'o ba! Ó nia fiar mak soi tiha ó!"»

To'o iha ne'e Lucas salienta Jezús nia laran-sadia ba marjinalizadu sira, kbiit liafuan nian no obediénsia iha dixipuladu. Maibé relatu ne'e iha parte daruak ne'ebé foun liu no hatudu sai tema foun furak husi evanjellu Lucas nian: orasaun no samaritanu ida ninia atitude simu nian (inimigu ne'ebé hetan simun), samaritanu ida ne'ebé fó obrigadu!

Parte daruak ne'e hahú ho virada ida: **“Sira ida, haree katak nia isin di'ak fali ona, fila fali...”** (17,15). Nia la bá amlulik sira maibé halo dalan filafali ba iha ne'ebé Jezús hela bá. Nune'e realiza enkontru daruak ho Jezús.

Se iha enkontru dahuluk la'o tuir dinámika “petisaun-resposta”, ida daruak ne'e tuir “gratidaun-salvasaun”; iha kazu rua hotu haktuir aspetu sira esperiénsia fiar nian. Hanesan Jezús rasik hatudu iha ninia liafuan ikus, enkontru daruak ne'e iha nivel aas liután duké ida dahuluk no ita lamenta tanba la'ós sira hotu konsege nia (1 husi10).

Ita ba haree parte tolu enkontru daruak nian ho Jezús:

(1) Leprozu ida ninia filafali no jestu gratidaun nian iha Jezús nia ain (17,15-16).

(2) Jezús nia interpelasaun-komentáriu: lia-husun tolu (17,17-18).

(3) Samaritanu nia mandatu (17,19)

2.1. **Leprozu ida ninia filafali no jestu gratidaun nian iha Jezús nia ain (17,15-16).**

Afirmasaun haat atu haktuir leprozu ida ninia filafali:

(1) **“filafali”** ba Jezús bainhira **“haree”** nia kura ona: Pontudepartida ba enkontru daruak maka konxiénsia kona-ba buat ne'ebé Mestre halo iha nia moris. Nia movimentu hahú husi ninia hahalok **“haree”** nian. Nia husik lei tuan hodi bá sentru foun ne'ebé husi nia mai Maromak nia obra, katak Jezús Mesias.

(2) Hahi'i'in ba Maromak iha nia dalan: **“hahi'i Maromak ho lia maka'as”**: ema la filafali naranaran de'it, maibé hananu no bidu hahi nian ba Maromak. Leprozu ida-ne'e inklu iha lista personajen sira evanjellu nian ne'ebé hatene rekoñese Maromak nia obra iha Jezús: sira ne'ebé la haree de'it liman sira ne'ebé ofere se presente maibé identidade ema ne'ebé tulun sira. Ezemplu sira hanesan paralítiku ne'ebé kura (5,25), ema lubun boot liutiha feto-faluk Naim nia oan mate ne'ebé Jezús halo moris-hi'as (7,176), feto kotuk kle'uk ida (13,13), nia evanjelu taka mós ho comunidade eskolante sira nia hahi'i'in ba Maromak (24,53). Haree Maromak manifesta an – koko ninia kbiit – ninia domin boot ba ema ki'ik no marjinalizadu sira, ema labela la hahi ninia kmanek sira.

(3) Espresaun gratidaun nian ba Jezús akompaña ho jestu ida hakru'uk to'o rai: **“nia monu ba Jezús nia ain, hakru'uk to'o rai, hodi agradesese”**: Ita la hatene liafuan sá maka nia dehan ba Jezús, maibé jestu ne'ebé nia halo dehan buat barak: nia hakru'uk tomak iha nia oin. Jestu ida-ne'e iha linguajen korpóreu orasaun nian indika submisaun, respeitu, saran-an, adorasau, abandonu. Ho maneira ida-ne'e ema rekoñese Maromak nia baboot no konsagra moris tomak ba Nia. Iha kazu ida-ne'e nia maka maneira atu **“agradesese”**: gratidaun la'ós espresaun verbál ida ne'ebé dehan ema ida rekoñese no sente obrigasaun ba Jezús, ne'ebé hatudu ninia favór, maibé atitude ne'ebé loke odamatan ba relasaun ida kle'an liu ho Nia no ba Nia ofere se nia moris tomak iha impulsu ida domin totál nian. Gratidaun nia espresaun maka saran-an rasik, nune'e domin esprime tuir dalan rua.

Konserteza iha ne'e iha konfisaun fiar implísita ne'ebé ema ne'e tau iha nivel hanesan entre **“hahi'i Maromak”** ho **“monu ba Jezús nia ain”**.

Ikusmai, gratidaun ema ne'e nian supera maka'as farizeu nia agradesimentu (18,11) no besik liu ba Jezús nia saran-an eukarístiku (22,17.19), nu'udar plenitude orasaun nain. Gratidaun evanjélik, ne'ebé iha ligasaun ho impulsu domin totál nian ba Maromak, esprime liuhusi maneira foun saran-an nian ba maun-alin sira.

(4) Evanjelista nia anotasaun: **“Ema ne'e Samaritanu ida”**: Narradór husik ba momentu ida-ne'e

surpreza foun: ema ne'ebé halo buat hotu ne'e samaritanu ida. Iha ai-kanoik "samaritanu di'ak" inimigu antigu judeu sira nian, sai modelu ida ema sira ne'ebé konverte an no moris tuir Jezús nia laran-sadia no, iha ne'e, nia sai modelu orasaun nian iha tempu foun sira.

2.2. *Jezús nia interpelasaun: lia-husun tolu (17,17-18)*

Entaun Jezús foti lia atu hatán ba jestu samaritanu nian ne'e. Nune'e ita to'o ba epizódium nia konkluziun.

Uluknana Jezús ko'alia ba ema hotu hale'u Nia no hafoin ba samaritanu: (1) iha ema hotu nia oin nia destaka faktu katak samaritanu mesak maka filafali atu agradese Maromak; no (2) ba samaritanu nia halo hamriik no haruka nia hodi deklarasiun nia salvasaun tanba fiar ne'ebé nia soi.

Hanesan kaskata ida, Jezús halo lia-husun tolu ba lee-na'in sira atu hatán. Sira ne'e maka lia-husun lójiku no iha resposta implísita:

(1) "¿*La'os ema na'in sanulu mak hetan isin di'ak?*" Resposta husi ida-ne'ebé lee v.14: "sín".

(2) ¿*Sira na'in sia iha ne'ebé?*" Resposta: "kontinua sira nia dalan".

(3) "¿*Ema ida la fila atu hahi'i Maromak, mak ema malae ne'e de'it?*" Iha-ne'e di'ak liu hatán maibé aplika nu'udar xamada atensaun nian atu bele hatán: "ha'u mós hakarak fó glória ba Maromak".

Lia-husun datoluk destaka kontraste kuantitativu no kualitativu iha relatu ne'e nia laran: Husi na'in sanulu ne'ebé hetan isin-di'ak, ida de'it maka fila; judeu na'in sia tenke fó glória ba Maromak maibé "ema malae" (espresan atu koloka samaritanu sira iha nivel jentiu nian tanba nia la'ós ema judeu). Faktu katak ida mesak de'it, hateten mai ita katak espiritualidade gratidaun nian la'ós buat ida komún ka fasil; liután ne'e presiza iha atensaun ba presupostu fundamentál ida.

Jezús apresenta samaritanu nu'udar ezemplu ema ida nian ne'ebé hatene halo dalan espiritualidade gratuidade nian. Ita bele komprende di'ak liu ida-ne'e se ita konxiente katak iha ninia liafuan sira bele nota denúnsia ida kona-ba povu judeu ne'ebé foti-an basá lakohi konfesa Maromak loos ne'ebé haraik salvasaun (kf Jn 4,22). Hanesan bele nota iha kazu konkretu ida-ne'e: ema judeu-laek ne'e, ne'ebé la soi priviléjiu relijiozu ida, hatudu katak nia iha komprensaun di'ak liután kona-ba Maromak nia obra no dinámika salvasaun nian.

Ema leprozu samaritanu ninia hahalok kultu nian – ne'ebé hetan diskriminasiun maruak ba ninia rasa no moras – hatudu katak realidade foun Reinu nian iha ita-nia oin "ki'ik sira' maka komprende revelasiun, la'ós "matenek sira" (Lc 10,21). ¡Perigu boot ida matan-delek nian ba ema sira ne'ebé toman ho Maromak no haree ba ninia relasiun ho Maromak iha lójika direitu ne'ebé manán. Ezemplu hanoin katak Maromak tenke fó ida-ne'e mai ha'u tanba ha'u submete ba Maromak! ¡Ema ne'ebé ladún hein, konxiente kona-ba ninia indignidade, nafatin hatene apresia fafurak prezente nian bainhira nia to'o mai! No ida-ne'e la'ós tanba tenke halo maibé tanba Nia hadomi maka presupostu fundamentál ba espiritualidade gratidaun nian ne'ebé ita haree samaritanu nu'udar modelu.

2.3. *Samaritanu nia mandatu (17,19)*

Jezús nia liafuan ikus dirije ba samaritanu: (1) fó orden ba nia atu hamriik husi adorasiun no (2) kontinua nia dalan. Se ita kompara ida-ne'e ho kazu seluk iha ne'ebé Jezús dehan liafuan hanesan, ita komprende katak Jezús la despede nia maibé konvida nia ba tatuir (kf 7,50; 8,1-3).

Ho imperativu rua ne'ebé nia fó sai ("**Hamriik, la'o ba!**"), Jezús nia komportamentu kontinua nu'udar "Mestre" nian. Orden dahuluk lori leprozu na'in sanulu atu aprende obediénsia fiar nian; orden daruak dirije ba ida mesak ne'ebé filafali atu agradese, kbiit husi Jezús nia Liafuan integra nia iha dinámika dixipuladu nian (nu'udar ezersísiu kontínuu fiar nian iha aspetu hotu moris nian).

Hafoin mai fraze datoluk no dahikus, deklarasiun furak ida ne'ebé sintetiza esperiénsia hotu iha

enkontru ho Nia: “**Ó-nia fiar mak soi tiha ó**”. Frazee hanesan ita rona ba dala tolu: Jezús dehan ne’e ba feto sala-na’in ne’ebé “hatudu domin boot” (7,47), ba feto aten-barani ho moras raan nakfakar ne’ebé ba nia natón de’it atu “kona” Jezús “nia hatais (8,44); hafoin ba matan-delek Jericó nian ne’ebé persevera iha ninia hakilar “iha dalan nia ninin”, Nia mós dehan liafuan hirak ne’e (18,42).

Fiar sai kauza ba kura no salvasaun. La’ós katak sira seluk la iha fiar, problema maka sira nia fiar lakompletu tanba sira la esprime gratidaun. Ida-ne’e importante tebes. Jezús hatudu diferensa sira-ne’e:

(1) Relasaun ho Maromak ne’ebé hatudu liuhusi orasaun tenke integra “petisaun” ho “agradesimentu”. La’ós de’it simu maibé mós fô, nafatin iha dalan maruak ne’e mak orasaun tenke la’o tuir. Hasoru prezente sira ne’ebé ita simu, Jezús dehan momoos katak tenke “**hahi’i Maromak**” (17,18).

(2) Salvasaun la’ós de’it rekuperasaun saúde nian maibé mós simu Maromak nia Reinu iha Jezús. Ne’e katak, isin-di’ak la’ós favór simples ida atu supera estadu ida sofrimentu nian maibé kona liu ema nia moris kle’an: halo nia buras iha domin. Tanba ne’e ema ne’ebé agradeke koko salvasaun ida ne’ebé ba liu kura fízika: mudanza ida iha orientasaun interiór!

(3) Salvasaun konsiste iha plenitude moris nian hodi to’o ba destinu ita-nia moris nian, nia hahú iha-ne’e hodi moris tuir Reinu (tanba ne’e isin-di’ak importante) maibé tenke buras ba beibeik to’o halo ita-nia moris tama kle’an iha Maromak nia moris rasik, iha komuñan domin nian ho Nia. Tanba ne’e presiza dalan fiar nian, fiar ida saran-an nian, konsagrasaun nian, knananuk gratidaun no hahi’in nian ne’ebé halo fuan sira hakmatek iha kontemplasaun glória Maromak nian iha istória umana.

Atu taka...

Hasoru mentalidade posivel ida “milagrerista” nian, ne’ebé husu atu halakon terus maibé la hodi kompromete fuan, evanjellu ohin nian eduka ita ba “espiritualidade gratidaun nian”, gratidaun ida ne’ebé se moris iha itineráriu fiar nian hanesan samaritanu nian, lori ita atu tuku tuur iha Jezús nia ain no dudu ita ba dinámika foun iha dixipuladu. Importante mai ita atu manán nivel daruak fiar nian,- fiar ne’ebé so’i – liuhusi enkontru foun ida ho Jezús!